

SCRIPT OF MORNING GOJRI NEWS BULLETIN 12SEP 2026 1015HRS

مارننگ گوچری نیوز بولیشن 12 ستمبر 2026

یوہ آکاشوانی جموں ہے عبدالرحمان تیں خبر سُنو۔

BRICS SUMMIT

ویں برکس سربراہ کانفرنس اج نویں دلی غا بھارت منڈپم مانہ شروع ہون جارئی ہے یوہ دو 18 روزہ اہم اجلاس 11 بڑی اُبھرتی وی تے ترقی پزیر معشیتاں نانہ یکجا کرے غو۔ جن مانہ برازیل ، چین ، مصر م ، ایتھوپیا، انڈونیشیا ، بھارت ، ایران ، روس ، سعودی عرب ، جنوبی افریکہ تے متحدہ عرب امارات شامل ہیں۔ اس اعلیٰ سطحی تقریب غے دوران برکس غا ممبر ممالک گا لیڈراں غی طرفوں عالمی طرز حکمرانی کثیر الجہتی نظام تجارت و سرمایہ کاری ، ٹیکنالوجی خوراک و توانائی غا تحفظ ، صحت عامہ ، قدرتی آفات سنگ نمڑن غی صلاحیت تے اہم سپلائی چینز سمیت اہم امور ور تبادلہ خیال متوقع ہے۔ یوہ سربراہ اجلاس بھارت غی 2026 غی برکس صدارت غے تحت منعقد کیو جارہیو ہے۔ جس گو موضوع ہے، لچک ، جدت، تعاون تے پائیدادی واسطے تعمیر۔

CS PMG

جموں کشمیر مانہ قومی پروجیکٹ نگران گروپ غی طرز ور ایک مخصوص پروجیکٹ نگران گروپ قائم کیو جارہیو ہے تانجے بڑہ ترقیاتی پروجیکٹاں غی اعلیٰ سطح ور نگرانی نانہ یقینی بنایو جاسکے تے اُن غی تکمیل مانہ مائل روکاوٹاں نانہ مربوط انداز مانہ دور کرن مانہ سہولت فراہم کی جاسکے مرکز مانہ موجود ادارہ جاتی نظم نانہ مرکز غا نمائنداں نے چیف سیکرٹری غے سامنے پیش کیو مجوزہ نظام گو مقصد پروجیکٹاں غی نگرانی نانہ مضبوط بنائو، بکھ بکھ محکمان غے بشکار بہتر نال میل قائم کرنو تے اراضی گا حصول ، قانونی وضابطہ جاتی منظوریں ، تعمیراتی اجازت ناماں تے منصوبیاں گا نفاذ غے متعلق دوجا امور مانہ بروقت مداخلت نانہ یقینی بنائو ہے۔ اس بارے بولتا واں چیف سیکرٹری اٹل ٹلو نے کہیو ہے ہم نانہ ٹیکنالوجی تیں فائدو چاتاں واں وقفہ وقفی سنگ پیش کی جان آلی تازہ رپوٹس غا نظام تیں اگے بدھ غے حقیقی وقت مانہ پروجیکٹ غا سنگ میل ور نگرانی گا نظام نانہ اپنائو چاہیے۔

ARMY CMNDR SECURITY JK

شمالی فوجی کمانڈر لیفٹیننٹ جنرل پرتیک شرما نے کل کہیو ہے جے شمالی کمانڈ نے جموں کشمیر مانہ سلامتی نانہ یقینی بنان غے نال نال وادی غا نوجواناں واسطے ترقی غا موقع پیدا کرن تے اُن گا مستقبل نانہ بہتر بنان واسطے وی کم کیو بے ضلع انتت ناگ گا پہلگام علاقہ مانہ آرمی گڈویل سکول آے جی ایس مانہ منعقد ایک تقریب سنگ خطاب کرتا واں لیفٹیننٹ جنرل شرما نے فوج گا سلامتی تے معاشرہ نانہ باختیار بنان گا دوہرہ کردار گو اعادو کیو۔ انہاں نے کہیو کہ جد ہم ویکست بھارت در اگے بدھ رہیا ہاں ، شمالی کمانڈ خطہ مانہ امن و سکون نانہ یقینی بناتاں واں قوم غی تعمیر واسطے اپنا عزم ور ثابت قدم رہ غی۔ انہاں نے مزید کہیو ہے جموں کشمیر غا لوکاں واسطے یوہ ہی اُن گو عزم ہے۔

GOC WKC KISHTWAR VISIT

فوج غی وائٹ نائیٹ کاپس غا جنرل آفیسر کمانڈنگ جی او سی لیفٹیننٹ جنرل پی کے مشرا نے کل ضلع کشتواڑ گا بکھ بکھ علاقہ گو دورو کیو تے اُن غی حفاظتی صورتحال انسداد دہشت گردی غا نظام تے فوجی دستاں غی اپریشنل تیاریاں گو جائیزو لیو کور کمانڈر نے حفاظتی نظام ہنگامی حالات سنگ نمڑن غی تیاریاں تے بُنیادی تہانچہ غو جائیزو لیو۔ تے فوجی دستاں نانہ ہدایت دتی کہ وے آپریشنل کارکردگی حفاظت تے دور دراز علاقہ مانہ معاونت نانہ مزید بہتر بنان واسطے اضافی اقدامات کریں۔

DGP BORDER PROTECTION GRID

جموں کشمیر پولیس گا ڈی جی پی نلین پربھات نے بی ایس ایف ، سی آر پی ایف تے جموں کشمیر پولیس گا سنٹر افسران تے دوجی حفاظتی ایجنسیاں گا عہدے داراں سنگ سرحدی حفاظتی نظام گو جائیزو لیو۔جائیزہ غے دوران ڈی جی پی نے موجودہ سرحدی حفاظتی انتظامات تے موثر سرحدی تھفظ واسطے تعینات بکھ بکھ حفاظتی فورسز غے بشکار تال میل گو جائیزو لیومینٹنگ مانہ بکھ بکھ اداراں غے بشکار باہمی رابطہ تال میل مضبوط بنان ، آپریشنل تیاری ناہ بھتر کرن تے حساس و دور دراز علاقہ مانہ مضبوط حفاظتی نظام ناہ یقینی بنان ور توجہ مرکوز کی گئی۔

RANA DEVP WORKS

جل شکتی غا وزیر جاوید احمد رانا نے کل ضلع پونچھ غا سرنکوٹ علاقہ مانہ ترقیاتی کماں تے ہالیہ سیلاب غے بعد امدادی و بحالی غا اقدامات گو جائیزو لین واسطے ایک میٹنگ غی صدارت کی میٹنگ غی صدارت کرتا واں وزیر موصوف نے جل شکتی محکمہ ناہ ہدایت دتی جے سرنکوٹ قصبہ گا پانی غی فراہمی گا نظام ناہ مضبوط تے بھتر بنان واسطے تفصیلی ڈی پی آر پیش کریں۔

ARTISANS-IFFJK SHOW

کشمیر غا محکمہ دستکاری تے ہتھ کڈی نے اپنی مقبول ، اپنا کاریگر ناہ جانیں ، سیریز غی کامیابی تیں بعد ، ستمبر غا شمارا غو کامیاب انعقاد سرینگر غا ایس کے پارک مانہ جموں کشمیر غا پہلا بین القوامی فلم تقریب غا موقع ور کیو۔اس نمائش مانہ کشمیر غی جی آئی ٹیگ آلی قیمتی تے ختم ہوئی دستکاریاں ناہ نمایا کیا گیو۔ نمائش مانہ فن ، دستکاری تے ورثہ گا خوبصورت امتزاج پیش کیا گیا، جس ناہ سیاحاں ، فن غا شوقین افراد ، طلبہ تے عام لوکاں غی جانب تیں زبردست رد عمل لیو۔ محکمہ غا ترجمان نے کل ایک پریس بیان مانہ دسیو کہ نمائش مانہ 26 سٹال لایا گیا تھا، جت ہتھ تیں بنی کئی منفرد اشیائ پیش کی گئیں لوکاں نے ماہر کاریگراں تیں براہ راست گل بات کی تے اصل دستکاریاں ناہ دیکھیو ، جد کہ کاریگراں ناہ اپنی مصنوعات براہ راست فروخت کرن گو موقعو لیو۔

CROCHET BUSINESS UDH

ادھمپور غی ایک خاتون نے روایتی کروشہ غا فن ناہ کھر چلان آلو کامیاب کاروبار مانہ تبدیل کیو ہے۔ ادھمپور غی 28 سالہ پوسٹ گریجویٹ ، پلوی سیٹھ نے روایتی قریشہ تے اون تیں بنی دستکاریاں گا شوق ناہ ایک کامیاب گھریلو کاروبار مانہ تبدیل کیو ہے۔ اُن غا ہتھ غی تیار کردہ اشیائ ، جن مانہ کلیراں ، جے مالا ، گل دستہ ، چابی غا چھلہ تے اپنی پسند غے مطابق سجاوٹ غی اشیائ شامل ہیں ، ہُن جموں ، کٹرا ، ادھمپور تے آس پاس غا علاقہ گا صارفین توڑی پُچ رئی ہیں۔ ان غو مقصد مزید دیہی خواتین ناہ اپنا ہنر ناہ مستقل روزگار تے آمدنی گو ذریعو بنان غی ترغیب دینو ہے۔

RESHAM RBN

ملک گیر ریشم غی صنعت تیں متعلق آگاہی تے جدید ٹیکنالوجی غی منتقلی غی مہم، میرا ریشم ، میرا ابھیمان ، غے تحت ضلع رام بن مانہ کساناں واسطے کئی تربیتی پروگرام منعقد کیا گیا۔ یہ پروگرام محکمہ سیریکلچر رام بن غی جانب تیں منعقد کیا گیا۔ جاری مہم ، ریشم غی صنعت ناہ بھتر بنان مانہ اہم کردار ادا کررئی ہے۔ اس گے تحت ماہرین غی معلومات براہ راست کساناں توڑی پُچائی جارئی ہیں تے اُنہاں ناہ بھتر پیداوار تے روزگار واسطے ضروری معلومات تے سہولیات فراہم کی جارئی ہیں۔ محکمہ غی تکنیکی ٹیم نے کساناں ناہ سائنسی طریقہاں تیں ریشم غی پیداوار ، معیار تے آمدنی بھتر بنان گا بارا مانہ رہنمائی فراہم کی ۔
